

HEADLINES

- ۱۔ لیفٹیننٹ گورنر منوج سنہا نے مبینہ طور پر دہشت گردی سنگ تعلق رکھن والا سرکاری ملازما نانہ نوکری تیں برخاست کرن غو حکم دتو ہے۔
- ۲۔ نفاذ بارے ڈائریکٹوریٹ نے زمین گوٹا لا کیا جان غا معاملہ مانہ جموں مانہ متعدد مقامات ور چھاپا ماریا ہیں تے آئی ٹی محکمہ نے ادھمپور ضلع مانہ زمین غی خریدو فروخت کرن آلا ایک ڈیلر غا گھر ور وی چھاپا ماری کی۔
- ۳۔ مرکز نے کہیو ہے جے جموں کشمیر نانہ گزشتہ چار سالان مانہ قومی شاہراہ غا پروجیکٹاں واسطے 27 ہزار کروڑ روپیہ توں متی رقم لی ہے۔
- ۴۔ جموں کشمیر مانہ قبائلی مستفیدان نانہ 55 کروڑ روپیہ تیں زیادہ امداد جاری۔
- ۵۔ محکمہ موسمیات غی پیشن گوئی غے مطابق 23 تے 26 اگست غے بشکارپاری بارش تے سیلاب بارے خطرو ہے۔

EMPLOYEES DISMISSED

حکام نے دسیو ہے جے لیفٹیننٹ گورنر منوج سنہا نے جمعہ آلے تہاڑے مرکزی زیر انتظام علاقہ جموں کشمیر مانہ 2 سرکاری ملازما نانہ دہشت گرد سرگرمیاں مانہ مبینہ طور ور ملوث غے تحت (C) ہون ور نوکری تیں کڈ دتو ہے حکام نے دسیو ہے جے یوہ فیصلو قانون غی دفعہ 311(2) لیو گیو ہے۔ ایک ملازم غی پہچان پیڈ پالن محکمہ مانہ اسٹینٹ سٹاک مین غا طور ور کم کرریا سید احمد خان جس غو تعلق کیرن علاقہ توں بیتے دوجو خرسید احمد راتھر ایک سکول گو استاد جھیڑو کرناہ علاقہ غو بسنیک ہے غا طور ور کی گئی ہے یہ دوئے ملازم شمال کشمیر غا کپواڑہ ضلع غا رہن آلا تھا حکام نے مزید دسیو ہے جے لیفٹیننٹ گورنر منوج سنہا مقدمات غا حقائق تے حالات ور غور کرن تیں بعد مطمئن ہیں اٹنہاں نے کہیو جے دستیاب معلومات غی بنیاد ور دواں غی سرگرمی ایسی ہیں جے ان غی نوکری توں برطرف غی ضمانت دتی جے۔

ED RAIDS

نفاذی محکمہ نے اج جموں مانہ کئی مقامات ور چھاپا ماریا جت رونیو محکمہ غا گج افسراں تے دیگر افراد نانہ نشانو بنایو گیو جھیڑا مبینہ طور ور کروڑاں غی زمین گھوٹا لا مانہ شامل ہیں آکاشوانی جموں گا نمائندہ غے مطابق مرکزی یجنسی ٹیم مقامی پولیس تے سی آر پی ایف غے نال مل غے افسراں غا گھراں تے دفتر ور پُجی تے زمین اگ غیر قانونی سوداں تیں متعلق دستاویزات تے ڈیجیٹل ریکارڈ ضبط کیا۔ ای ڈی غی یاہ کاروائی اُس وقت کی جد جانچ ایجنسیاں نانہ غیر قانونی پیساں گا استعمال بارے جانکاری دتی گئی۔ اسی دوران آمدنی ٹیکس محکمہ غی ایک ٹیم نے ادھمپور غا باوسنگ کالونی مانہ ایک پراپرٹی ڈیلر گا گھر ور چھاپو ماریو یاہ کاروائی ٹیکس چوراں تے بے حساب آمدنی رکھن آلاں ور کی گئی۔

ARMY COMMANDER

شمالی فوج کا کمانڈر لیفٹیننٹ جنرل پراتیک شرما نے چسوتی بدل پھٹن غے دوران اُن غ طرفوں کی گئی آفات توں نمڑن غی کوشش واسطے فوجیاں غی تعریف کی بے لیفٹیٹ جنرل پراتیک شرما آرمی کمانڈر شمال کمان نے راجوری تے کشتواڑ مانہ اندرونی علاقوں غی تشکیلات تے یونٹاں غو دورو کیو تانجے فوجیاں نانہ ان غی طرفوں کی گئی بہتر کاروائی ور تعریف کی جاسکے تے نال ہی چسوتی بدل پھٹن غے دوران ایچ اے ڈی آرغی کوششاں مانہ تیز تے کامیابی سنگ انجام دتو گیو شمالی کمان نے ایکس ور کیا گیا ایک پوسٹ مانہ اس گل غو اظہار کیو قابل ذکر بے جے چسوتی بادل پھٹن غا سانجہ ور فوج نے 300 جواناں نانہ امداد فراہم کرن تے بچاؤ کاروائیاں مانہ تعنیات کیو گیو بے۔

KHELO INDIA WATER SPORTS

کھیلو انڈیا آبی کھیڈ 2025 ڈل جھیل سرینگر مانہ جاری بے دوجا تہاڑا غو آگاز وی جوش و جذبہ تیں ہوو ملک غا مختلف حصاں تیں آیا کھیڈاریاں نے جوش غے نال مقابلوں مانہ حصو لیو گزشتہ روز افتتاحی تہارو تھو جس مانہ 17 سالہ مقامی شکارا آلا محسن اعلیٰ نے مرداں غی 1 ہزار میٹر کایا کنگ دوڑ مانہ 4 منٹ 12 سکینڈ غا وقت مانہ پہلو سونا غو تمغو حاصل کیو اج غا مقابلوں مانہ رشمیتا سابو جہیرو اوڈیسا تیں بیس خواتین غا کینو نگ مانہ 1200 میٹر دوڑ جیت غے سونا غو تمغو حاصل کیو بے۔

PRO ANNOUNCEMENT

علاقائی خبراں آلا شعبہ آکاشوانی جموں نے حال ہی مانہ پارلیمان مانہ پاس کیا گیا آن لائن گیمنگ بل 2025 غا فروغ تے ضابط ور 20 منٹ غا ویلہ غو ایک خصوصی مباحثہ پروگرام منعقد کرے گو۔ خصوصی نشریات 23 اگست 2025 بروز ہفتہ دوپہر 12 بج غے 30 منٹ ور نشر کی جے گی۔ اس خصوصی پروگرام مانہ مارا مہمان محمد یاسین کچلو آئی پی ایس ، ایس ایس پی سائبر کرائم بارے پوچھ تاچہ مرکز برائے ایکسلینس اس عنوان غا موضوع ور اپنی بصیرت تے ماہرانہ خیالات گو اظہار کریں غا۔ اس پروگرام غی میزبانی ماری اینکر شروتی کھجوریہ کریں گی۔ آکاشوانی غی خبر جموں تیں میڈیم ویو 303 میٹر یعنی 990 کلو ہٹز تے ایف ایم 104.5 میگا ہٹز ور سن سکیں غا۔

JK HIGHWAYS

قومی شاہرہ تے گڈیاں لاریاں بارے مرکزی وزارت نے گزشتہ چار براں مانہ جموں کشمیر مانہ قومی شاہرہ غی تعمیر تے اُن نانہ مزید بدان غا منصوباں مانہ اہم پیش رفت غو انکشاف کیو بے۔ آکاشوانی جموں گا نامہ نگار نے خبر ثوری بے جے مرکزی وزیر برائے قومی شاہراہ تنن گڈکری نے کہیو بے جے جموں کشمیر نے سڑک غا بنیادی ڈھانچہ مانہ مسلسل سرمایہ کاری دیکھی بے حالانکہ پروجیکٹ غی لاگت تے پھیلاؤ مختلف بے اُنہاں نے کہیو جے جموں کشمیر مانہ 2021-22 تے 2024-25 گے بشکار 43 قومی شاہراہ ترقی تے اُن گا بدان بارے پروجیکٹاں نانہ منظوری دتی گئی تھی جس مانہ 27 ہزار آتھ سو کروڑ روپیہ توں متہ غا مجموعی لاگت توں تقریباً 653 کلو میٹر سڑک غی لمبائی شامل بے جناب گڈکری نے مزید کہیو جے پیام گتی شکتی نیشنل ماسٹر پلان غے سنگ ہم آہنگی ان مرحلہ وار تے ترجیحی پیش رفت مانہ وی واضع بے۔

JK TRIBAL DEVP

قبائلی امور غا مرکزی وزیر مملکت ڈپرگاداس یو کے نے کہیو کہ جموں کشمیر نے تعلیم تے روزگار غے ذریعے قبائلی ترقی مانہ اہم کامیابی حاصل کی ہیں۔ آکاشوانی جموں غا نمائندہ غے مطابق وزارت نے لوک سبھا مانہ دسیو کہ گزشتہ پنج مالی سالان مانہ جموں کشمیر گا قبائلی افراد نانہ مختلف سکیمیں جسران کہ ٹرم لون، آدی واسی مہیلا سسکتی کرن یوجنہ مائکرو کرڈیت فائیننس تے آدیواسی شکشا روزگار یوجنہ غے تحت 55 کروڑ 19 لکھ روپیہ غی مالی مدد فراہم کی گئی ہے۔

PUBLIC HEARING

جموں کشمیر آلودگی قابو کمیٹی کشتواڑ نے ڈلہستی سٹیج 2 پن بجلی پروجیکٹ واسطے بینزوار گراں مانہ عوامی اجلاس غو انعقاد کیو اس پروگرام مانہ اہم افسران نے شرکت کی جن مانہ ایڈیشنل ترقیاتی کمشنر کشتواڑ پون کوتوال تے جی ایم سوریش کمار جہیڑا پروجیکٹ غا سربراہ ہیں تے اونیش کمار شامل تھا اس اجلاس مانہ ماحولیاتی اثرات ور گل بات ہوئی تے اہم شراکت داران غی رائے لی گئی۔ اے سی آر کشتواڑ ادریس لون وی ات موجود تھا۔ اس بارے مزید گل کرتا واں جی ایم سُرش کمار نے اس طرح کہیو۔

WEATHER

مقامی محکمہ موسمیات غی طرفوں موسم غی اک تفصیل جاری کی گئی ہے جس مانہ آئیندہ دنان غے دوران پہاری بارشاں ت ممکنہ سیلابی صورتحال غو امکان ظاہر کیو گیو ہے آکاشوانی جموں گا مہارا نمائندہ نے جانکاری دیتا واں دسیو ہے جے اس موسمی پیشن گوئی غے مطابق جموں ریاسی ادھمپور راجوری کٹھوعہ تے سانہ مانہ 22 اگست غی رات نانہ پہاری بارش غو امکان ہے جدکہ 23 تے 26 اگست غے بشکار زیادہ تر موسم خراب رہن غی پیشن گوئی ہے جد بلکی تیں درمیانہ درجہ غی بارشاں ت گرج چمک غوا مکان ہے جدکہ گج علاقان مانہ پہاری بارش وی بوسکے اس عرصہ مانہ پہاری بارش سنگ جموں ریاسی ادھمپور سانہ کٹھوعہ راجوری انت ناگ تے گلگام غا علاقہ متاثر ہو سکیں۔ جد کہ پونچھ رام بن ڈوڈھ تے کشتواڑ مانہ درمیانہ تیں پہاری بارش غو امکان ہے۔
